



DEO OPTIMO MAX.
UNI ET TRINO,

VIRGINI DEIPARÆ, ET S. LUCÆ
Orthodoxorum Medicorum Patrono.

QUÆSTIO MEDICA.

QUOD LIBETARIIS DISPUTATIONIBUS,
*manè discutienda in Scholis Medicorum die Martis vigesimo-octavo
Novembris M. DCC. XLI.*

M. LAURENTIO FERRET,
Doctore Medico, Chirurgiæ Gallico Idiomate
Professore designato, Præsido.

An Dolor à solutâ unitate morbus?

I.



OLERE & pati, reæ gentis humanæ stipendium: jugum commune, violentum: pœna pro rebellionis ratione. Ideò ut vitam à doloribus auspicamur, sic ab eâ vi dolorum ejicimur. Medii temporis cursus vix motu tranquilliore peragitur: nisi contingit indolentia, perpetua ferè dolorum successio est. Hunc enim si dividunt deliciae, quanti brevis emittur aura voluptatis! fons est fermento vitiatas, ut etiam si quid incidat dulce, protinus amarescat. Utrouque carere melius: nam voluptatem emere dolore non est lucrum, sed pensatio. Beatus ille

qui minimis urgetur malis. Ut autem omnes eadem non manet nox, sic dolor non idem. Morbus est qui de corio humano variè ludit. Modò silentio subit infusus, modò favit aperto Marte truculentus. Foris aggreditur aliquandò cutim inquietaturus, aliquandò sedens in alto nobile viscus tangit. Nunc parti fixus hæret, alias mobilis totum corpus pervagatur. Infelices agri! seu vexent eos longi doloris tormenta, seu acuti, morsus. Sunt quæ adhuc vitæ portio manent aliqua, dum periodicè repetens dolor, iis quasdam dat inducias; alios adco assiduus urget, ut illis pœna sit totum quod vivunt. Ad hæc, præter sinceros dolores quos fateri cogitur etiam Stoica patientia, sæpe dolemus ad opinionem, & tam æger est quisque quàm credit. Triste morbi genus, & plus quàm corporeum! ex parte mentis, sentias quid sit potius quàm definias. Ex parte corporis, juxta veteres & recentiores nonnullos, in solutione continui constat; cui sententiæ nec ratio consentit, nec favet experientia. Causa cognoscitur ab effectibus. Doloris effectuum igitur habenda ratio. Inter hos (a) inquires, jactatio, vigiliæ, febris, calor, sitis, siccitas, convulsio, gangræna numerantur.

(a) Boerhaave
Aphorif.

I I.

DUM dolet homo, natura ipsius alteratur & corrumpitur, inquit Hippocrates. Non enim ad evertendam sanitatem semper opus esse existimes ut prius viciantur humores, sanguisve copiâ redundet. Hæc sunt causæ morborum valentes, non solæ. Quid enim non asportat mali dolor? pulsât aequè robustum ac imbecille corpus, neque melius constituto parit. Sic in venæ sectione è brachio, puncto nervo vel tendine, quot mala non nascuntur, doloris effectus? conveniunt simul, inquires, jactatio, &c. Quot etiam non surgunt symptomata dum dentes præsertim canini tenetis infantibus erumpunt? simul ac illi gingivis mollibus ut toridem terebræ instant, protinus infans oritur dolor, magna pars effectuum sequitur, ingruunt pavores in somno, fiunt diarrhææ cum torminibus, aut stringitur alvus, accedunt asthmata, catarrhi suffocantes, epilepsie lethales. Si vermes in ventriculo, intestinisve nidulantes, adeo sensiles tunicas morsibus lacerant, in consensum rapitur nervorum systema, machina convellitur. Quid etiam non mover calculus ureteri inhaerens? Iniquo spatio inclusus ille, stationis impatiens, multis etiam horridus aculeis, perfodit summo cum dolore partem hanc cui natura sensum dedit exquisitum; hinc nausea, cibi fastidium, vomitus, frequens ructatio, tormina, alvi strictio, urinx stillicidium, ægra spinæ flexio, torpor cruris tot hujus mali comites individui sunt. Quin à dolore calculi acerbiori, fiunt urinx suppressio, pulsus febrilis, enumerati doloris effectus. Si calculus è cystide felleâ protusus, biliariis ductibus impactus est; dextrum hypocondrium implet cruciatibus, angitur æger, penè suffocatur intercepto spiritu, noctes ducit insomnes, alvum duram habet atque strictam, pulsusque contractum, extremis alget partibus, vomendi conatu fatigatur. Ast in partu quid non metuendum à doloribus? laboriosè parturienti surgit symptomatum ilias: ut spiritum ducat infans, penè mater expirat. Nec adeo magnis opus est ad movendas tot perturbationes. Spina pedi infixæ, deglutitæ acicula, acûs punctura, ungues incautè resecti, clavus pedum improvise sectus, ambustio partium nervo tendinosarum sufficiunt ut exinde tanti in machinâ corporeâ motus ciantur, tantæ excitentur procellæ, Adeo natura patitur & minimis!

PORRO tot symptomata soluri continui non sunt effectus. Ideo enim sanè dolorem naturæ autor videtur instituisse, ut eo moniti atque veluti stimulo excitati, ad ea quæ nobis noxia sunt avertenda præsto essemus. Doloris igitur sensatio tunc tantum excitatur, quando periclitamur. Facto enim damno si doleremus, inane esset monitum, irritum incitamentum. Quin scitius esset malum latere, elapsa ipsi occurrendi occasione, quam mentem damni cognitione frustrâ torqueri. Verùm tollit omne dubium experientia, cognitâ partis dolentis naturâ & indole. Fibra est, etiam minima, nervea, è cerebro orta; hæc nativo donatur elatere, scissâ statim fit brevior, contrahitur. Fibra igitur in sui contractionem nictu semper, semper indocilis extensionem pati. Simplicem quantumvis illam supponas, organicam tamen, & cum aliis vel connexam, vel continuatam fibris concipies. Simul his collectis, fit fibrarum congeries, fasciculus; iisdem legibus ac fibra simplex obnoxio. Pungatur ille, nascitur dolor, sequuntur doloris effectus. Undenam? Dum pungitur fasciculus, fibræ quædam solvuntur aliis remanentibus integris. Igitur quoad totum, fasciculus vim naturalis tensionis cum minori fibrarum numero quam antea sustinendam habet; Quoad partem, fibræ solutæ sese contrahunt, trahunt & integras quibuscum nectuntur, tendunt extrâ modum; violentus est status, fit irritatio, solutio proxima, dolor. Fibra enim nervea, mentem inter & corpus dulce societatis vinculum, utriusque pœna fit ingrato sollicitata motu, cerebro communicat impressionem, mens intenditur, excutitur è tranquillitate; commotâ animi contentione, fit oscillatio vehementior, commotio diuturnior, validior tensio. Sic à cerebro ad partem affectam, ab hæc ad illud, mutuâ & communicatione & repercussione, mens & corpus afficiuntur. Hinc puncto nervo vel tendine tot mala nascuntur, doloris effectus. Verùm non in fibrâ solutâ, at in integrâ, vicinâ, mox solvendâ, tanquam in subiecto hæret doloris sensus. Indè everso officiorum ordine, dirutâque partium sanâ & naturali conspiratione, summa imis immutantur.

I V.

NEC adversatur experientia rationi, quin alteram altera funditis stabilir. Factâ sectione puncti nervi vel tendinis, arger à cruciatibus favissimis liberatur, quibus ante sectionem immanè vexabatur. Tot igitur symptomata solutionis continui non sunt effectus. Aliàs quò major esset fibrarum solutarum numerus, eò vividior foret sensus doloris, eò effectus vehementiores. Erupto è gingivâ dente, queruli causa doloris evanescit; cedit & methodo non satis laudandæ quâ ferro vel ungue ad parandum dentibus exitum gingivæ aperiuntur. Si vermes intestinorum tunicas morfu vellicantes, amaris oleosisve pharmacis, seu depromptis è mercurio medicamentis necantur, aut fugam moliti coguntur, cessat illico tot symptomatum vehementia; sublata enim causâ tolluntur effectus. Quod manifestius est in quibusdam febribus acutis quæ primò intuitu portentis aliquid minantur, quorum symptomata magnum Medico negotium facessunt, nisi in primo morbi insultu perspicax ille emetico catharticoque ventriculum aut intestina abluerit. Hæc methodo sæpe vermes expelluntur, tot anxietatum iactationumque causa. Nunc, dum calculus mole vel figurâ vesicam fatigat, Quid lithotomiâ præstantius! excusso pondere, sublata asperitate, vesica sui juris fit, nervorumque systemati reddit pacem. Eadem ra-

tionem ubi laboriosè parturiens mulier uteri latens onus deposuit, quasi vitæ redita exultat doloris oblita sui. Quin & in male conformatâ, naturam operando inhabilem opere juvat Ars. Viam viæ subleuit, Cæsareâ operatione factum educit, per uteri lacus saluus salvâ matre extrahitur infans qui per collum nullo modo egressurus erat. Sic mulieri dies adduntur, quæ aliàs erat inter dolores animam efflatura. Igitur solutione continui factâ minuitur tensio valida, irritatio, dolor.

V.

EX his abundè liquet quantas in corpore turbas excitat, dum nos aggreditur, dolor. Quàm & corpori paulatim exhauriendo inimicas, & animo è sede suâ disijciendo funestas. Hinc verum adagium, ubi dolor ibi morbus. Nec minùs patet in solutione continui dolorem non esse, verùm fieri ubi partium sensu præditatum adeò valida est tensio, ut in proximo solutionis periculo versentur. Eâ ratione turbas movet, idiopathicè aliquando, aliquando sympathicè tantùm. Licet autem unus sit, & in fibrâ tantùm nerveâ sedem obtineat, pro diversitate tamen causarum ipsius, & morborum quorum frequens comes est, diversas affectat facies, semper aliquid discriminis allaturus. Sic in pleuritide pungit, urit in nephritide, torquet in colicâ, rodit in cancro, prurit in scabie, tundit, lacerat in syphilide, in arthritide dislocat. Ab effectibus tam diversis doloris causa nunc intelligitur. Multiplex assignari potest, (b) 1^o. Vis naturalis contractionis paucioribus fibris sustentata, dum quædam soluta sunt. 2^o. Quod vas fibris nervosis contextum nigris replendo distendit ut obstructio, plethora, cacochymia abundans, motusque circularis auctus, 3^o. Quod vi distrahit ut luxatio, tumor, vis externa, 4^o. Omne vulnerans & rodens, Dolorum igitur fomenta erunt sectiones, quæcitâ manu, instrumentisque acutissimis celebrari debent. Medicamenta vacuantia, sanguinis & humorum impetum sedantia. Extraneorum corporum ablatio, ea quæ vim habent emolliendi & laxandi. Hæc enim dum partes nerveas à causâ quâcumque tensas molliores & laxiores efficiunt, tensionis remissione solutionis periculum remouent.

(b) Boerhaave
Aphorif.

Non ergo dolor à solutâ unitate morbus.

DOMINI DOCTORES DISPUTATURI.

M. Josephus de Jusseu.

M. Robertus - Hubertus
Linget.

M. Thomas - Bernardus
Bernard, rei Herbaria Pro-
fessor.

M. Henricus - Franciscus
Bourdalin, Scholarum Pro-
fessor.

M. Petrus Roussin de
Montabourg, Consiliarius
Medicus Regii ordinarius,
nec non Urbis Regie Regii-
quæ Nosocomii San Germani in Layâ.

M. Camillus Falconet, Sa-
brin Consilii Regii Socius, &
è Regiâ Numismatum Aca-
demiâ.

M. Antonius-Joannes Daval.

M. Achilles - Franciscus
Fontaine.

M. Hyacinthus - Theodorus
Baron, Antiquus Facultatis
Decanus.

Proponebat Parisiis JOANNES - FRANCISCUS ISEZ, Parisinus,
Baccalaureus Medicus, A. R. S. H. 1741, à sextâ ad meridiem.